

Un logro pa nos comunidad como e prome na Aruba

Centro di Memoria ta conmemora 10 aña di dedicacion na su pashentnan



RIBA 12 di december 2024, Centro di Memoria ta celebra un logro hopi special, esta 10 aña di existencia y dedicacion cu e meta pa mehora e cuido pa tur cu tin deterioro cognitivo na Aruba. Loke a cuminsa na 2014 como un ambicion di un grupo di specialistanan pasiona, a crece y a bira awendia un clinica di memoria indispensable pa nos isla.

Centro di Memoria a habri su portanan oficialmente na 2014 danki na un colaboracion unico entre Horacio Oduber Hospital (HOH), SABA y Cas Marie como e prome y unico clinica di memoria na Aruba.

Cu un team multidisciplinario di specialistanan di cuido pa adulto mayor, internistanan, un neurologo, un psicologo, secretaria y un casemanager, ta ofrece diagnostico y guia pa pashentnan cu deterioro cognitivo. Banda di malesa neurodegenerativo, ta investiga, trata of señala tambe otro causa di problema cognitivo.

Durante e ultimo 10 añanan, e team dinamico di Centro di Memoria a yuda cu hopi orguyo aproximadamente 2100 pashent. Aña pasa a conoce un aumento notabel den registracion, cu ta indica e urgencia y importancia di nan trabou. Y ta anticipa cu esaki lo bay aumenta mas ainda den futuro.

E 10 aña di existencia di Centro di Memoria ta un momento pa para keto y reflexiona riba e gran impacto cu Centro di Memoria tabatin durante transcurso di aña, pero alabes pa enfoca y mira e oportunidadnan cu tin pa futuro. Cu un dedicacion sin fin, e team siguramente lo sigui pusha pa mehora e calidad y e cuido pa nos pashentnan cu deterioro cognitivo na Aruba.

Hunta di Directiva, Management y staff di HOH ta felicita e team completo di Centro di Memoria cu nan 10 aña di dedicacion y excelencia den cuido di memoria! Pabien Centro di Memoria y Pabien Aruba!

AWEMainta

Aviso pa Dianan di Fiesta

AWEMainta kier participa cu dianan di fiesta, **25, 26 y 27 di december 2024** lo no tin edicion di bo corant faborito.

Ultimo dia di publicacion di AWEMainta ta dia **24 di december** y e proximo edicion ta dia **28 december 2024**.

Y pa cera aña, dia **31 december 2024**, **1 y 2 di januari 2025** lo no tin corant.

Ultimo dia di publicacion ta dia **30 december 2024**. Proximo edicion lo ta dia **3 di januari 2025**.

Por fabor esnan cu kier pone propaganda y/of relato, pa tene cuenta cu e dianan menciona y pa manda esakinan pa **5or di atardi**.

Team di AWEMainta ta desea pueblo di Aruba

Feliz Dianan di Fiesta